

# Lubientscha per vehichels electronics

## Spertadad da bus sin l'autostrada

■ **(anr/vi) Ins duai survegnir pli tgunsch ina lubientscha per in vehichel electronic. E bus da lingias publicas duain dastgar ir 100 km/h sin l'autostrada. Cusseglier naziunal Martin Candinas (pcd/GR) ha inoltrà quest'emna duas intervenziuns.** Vehichels pli pitschens che marschan electronicamain duain vegnir classificgads en l'avegnir sco mopeds. Uschia fissi pli simpel da survegnir ina lubientscha. En ses postulat pretenda Candinas dal cusseglier federal dad examinar ina tala midada.

### Viriveri da prescripziuns

Automobils cun pitschens motors electronics dettia quai oz en tuttas variaziuns, scriva il cusseglier naziunal. Sin via vesian ins adina pli stedi tals vehichels futuristics. Ils uschenumnads «Klub-

fahrzeuge» cun quatter rodas e dus plazs da seser sajan pli e pli tschertgads tar glieud veglia. Els fetschian fin 30 kilometers l'ura e sajan adattads per distanzas da 60 kilometers. A persunas che stoppian desister pervi da la sanadad sin l'auto porschian quests vehichels ina alternativa.

Las perscripziuns per las lubientschas varieschian dentant. In «vespino» vesia ora sco in moped e na dovria ni numer, ni assicuranza ed a partir da 16 onns nagin permiss. Per in uschenunnà «Klubfahrzeug» – quests vehichels sajan fitg tschertgads tar seniors – stoppian ins avair lubientschas sco per in motor lev. I dovria in numer, in'assicuranza ed ins stoppia manar avant il vehichel. Ina nova classificaziun reduceschia la birocrazia e tractia a moda pli gista ils vehichels novs.

### 100 km/h per l'auto da posta

Da preschent dastgan bus dal traffic public ir sin l'autostrada mo 80 km/h damai ch'els transporteschian passagiers che stattan en pe. Bus privats dastgan dentant charrar cun 100 km/h.

Candinas pretenda en sia moziun ch'ins tractia tuttina ils bus dal traffic public sco ils bus privats. Sin l'autostrada possian ins gea supplitgar ils passagiers da prender plaz e da metter enturn la tschin-ta.

Da preschent sajan las lingias dal traffic public dischavantagiadas visavi ils bus privats, crititgescha il cusseglier naziunal.

Pertutgadas èn per exempel las lingias Cuira–Blinzuna, Cuira–Laax, Lucerna–Alddorf, Turitg–Affoltern u Yverdon–Vallorbe.